

GRENDELTYD LES: 'n Man na God se hart 1

Hierdie les kan oor 'n paar aande gedoen word.

1. YSBREKER

Julle gaan saam as gesin 'n 'scavenger hunt' hou. Daar is 'n lysie met 5 items wat julle of in die huis of buite moet gaan soek. Vir 'n 'scavenger hunt' word goed nie weggesteek of neergesit nie, jy gebruik dit wat in jou omgewing is.

'n Man na God se hart 'scavenger hunt'.

Instruksies: Gaan soek iets buite of binne die huis wat jou aan die volgende laat dink:

'n Man na God se hart 'scavenger hunt'.

Instruksies: Gaan soek iets buite of binne die huis wat jou aan die volgende laat dink:

1. Iets wat julle aan 'n skaapwagter laat dink.
2. Iets wat julle aan 'n koning laat dink.
3. Iets wat vir julle mooi is.
4. 'n Ronde, gladde klippe.
5. Iets in die vorm van 'n hartjie

Na die scavenger hunt, vra of hulle kan raai oor wie julle gaan praat as hulle so na die items voor hulle kyk.

1. INLEIDING

Ons gaan leer van 'n man wat baie bekend in die Bybel is. As ek die naam Goliath sê, aan wie dink julle? Dawid natuurlik.

Ons gaan na die eerste deel van Dawid se lewe kyk tot daar waar hy koning geword het. Ons gaan saam gesels en speel en tussenin gaan ek julle meer van Dawid vertel.

Saul was die heel eerste koning van Israel. Ongelukkig het hy nie geluister na wat God vir hom gesê het om te doen nie. God was nie tevrede daarmee nie, en Hy het 'n ander koning gekies. Kom ons luister wat met Saul gebeur het en wie die volgende koning sou wees.

Verhaal: 1 Samuel 16:14-23:

Die Heilige Gees het van Saul af weggegaan. Toe stuur die Here 'n slegte gees wat vir Saul baie gepla het. Saul se amptenare sê toe vir hom: "Ons kan sien dat 'n slegte gees u pla. Kom ons soek iemand wat mooi op 'n kitaar kan speel. Wanneer u dan weer sleg voel, kan hierdie man op sy kitaar speel. Dan voel u sommer weer beter."

Toe sê Saul: "Kry vir my so iemand." Toe antwoord een van Saul se amptenare: "Isaï wat in die dorp Betlehem bly, het 'n seun met die naam Dawid. Hy is 'n baie mooi man en 'n goeie soldaat. Hy speel ook mooi op die kitaar. Die Here help hom regtig altyd met alles."

Toe het Saul vir Dawid laat haal, en Dawid het vir Saul begin werk. Saul het baie van hom gehou. Hy het ook vir Dawid gekry om sy wapens vir hom te dra. Toe stuur Saul 'n boodskap na Isaï, Dawid se pa en sê: "Ek hou van Dawid. Ek wil hê jou seun moet altyd hier by my werk." Van

daardie dag af, elke keer wanneer die slegte gees vir Saul gepla het, het Dawid op sy lier (kitaar) gespeel. Die slegte gees het dan weggegaan. Daarna het Saul sommer dadelik beter gevoel.

Verhaal geneem uit dieBybel@kindersa.co.za, bl303, Redakteur: Hennie Stander

2. GOD KIES VIR DAWID

Aktiwiteit: Gee vir elkeen 'n skoon A4 blaaie. Hulle moet aan albei kante 'n hart teken wat die hele blaaie vol is – hulle gaan nou in die hart skryf. Elkeen kry kans om aan die een kant van die hart woorde te skryf wat God se hart ongelukkig maak. (bv. lieg, steel, stout, boelie, ens) Aan die ander kant skryf hulle woorde wat God se hart gelukkig maak. (Gehoorsaam, eerlik, vriendelik, help ander, ens).

Toe God die volgende koning gekies het, het Hy na iets baie spesiaals gekyk. Hy het gekyk na daardie persoon se hart. God gee om wat in ons harte aangaan en nie hoe ons van buite lyk nie. Kom ons hoor hoe God vir Koning Dawid gekies het.

Verhaal: 1 Samuel 16

Dawid pas elke dag sy pa, Isai, se skape op. Dawid is 'n goeie herder. Hy sorg dat die leëus en ander wilde diere nie die skape vang nie. Daar in die veld het Dawid baie tyd om aan die Here te dink. Hy maak vir God liedere en speel hulle op sy harp. Daarvan hou God sommer baie.

Op 'n dag besoek Samuel vir Isai. God het hom gestuur en gesê: “Samuel, jy moet 'n nuwe koning kies, een van Isai se seuns. Saul is 'n slegte koning en doen nie wat Ek sê nie.”

Dawid het nog sewe broers. Samuel weet nie wie hy moet kies nie. Al die seuns kom in, maar die een wat God gekies het, is nie daar nie. “Is dit al jou seuns?” vra hy vir Isai.

“Nee,” sê Isai. “Dawid pas skape op in die veld.”

“Laat haal hom dadelik,” sê Samuel.

Toe Dawid die boodskap kry dat Samuel hom laat roep het, hardloop hy vinnig huis toe. Hy wil baie graag hoor wat Samuel van God vertel. Toe Dawid binnekom, sê God vir Samuel: “Dit is die seun wat Ek gekies het. Hy moet die nuwe koning wees.”

Toe sê Samuel vir Dawid: “God wil hê jy moet koning word, maar eers wanneer Saul dood is.” Samuel het 'n horing vol olie saamgebring en gooi dit oor Dawid uit. Dit beteken Dawid is nou as koning gesalf.

Van toe af het die Gees van God met groot krag in Dawid gewerk.

Verhaal geneem uit Ons eie Kleuterbybel, bl.62-63, Juliana Nothnagel en Johann Strauss

3. DAWID EN GOLIAT

Aktiwiteit: Gooi Goliat om: Dawid het teen Goliat gaan veg met net 'n slingervel en vyf klippietjies. Maar God was aan Dawid se kant en hy het Goliat gewen. Druk 'n “Goliat” op karton uit en gebruik 'n ping pong balletjie vir die speeltjie, sou julle kies om dit speel. Laat Goliat so entjie van julle af staan. Een vir een kan julle die ping pong balletjie na Goliat gooi om hom om te gooi. Tel hoeveel keer julle Golia in een minuut kan omgooi.

Verhaal: 1 Samuel 17

Dawid se broers is soldate en hulle maak oorlog teen die Filistyne wat hulle beeste en skape steel. Dawid wil ook gaan veg, maar hy is nog te jonk. Eendag sê sy pa: "Dawid, neem vir jou broers kos en hoor hoe dit met hulle gaan."

Toe Dawid die soldate sien, rek sy oë. Die Filistyne staan aan die een kant, die Israeliete aan die ander kant. Hy sien 'n reus wat 'n Filistyn is nader kom. Sy naam is Goliat en hy skreeu: "Kies 'n man om teen my te veg. As ek wen, is ons baas, maar as hy wen, is julle baas." Goliat sê ook lelike dinge van God.

Die soldate is baie bang, maar Dawid sê: "Waarom is julle bang? Ek sal teen hom veg. God sal my help."

Hulle neem Dawid na koning Saul, maar hy sê: "Jy is net 'n jong seun. Hoe kan jy teen 'n reus veg?"

Toe sê Dawid vir Saul: "Maar ek het al baie dapper dinge gedoen. Ek pas my pa se skape op. Partykeer kom 'n leeu of 'n beer en dan vang hulle 'n lammetjie. Ek hardloop dan agter die wilde dier aan en slaan hom met my kerie dood. So red ek dan die lam uit sy bek. As die leeu of beer my bestorm, gryp ek hom aan die keel en slaan hom dood met my kerie. Dis presies wat ek met hierdie Filistyn sal maak. Hy het mos so 'n groot mond en sê mos slegte dinge van God se soldate. Dieselfde Here wat my help as ek met die wilde diere veg, sal my ook help wanneer ek teen hierdie Filistyn veg." Toe sê Saul vir Dawid: "Goed. Gaan maak so. Mag die Here jou help."

Toe neem hy sy herderstaf en slingervel, tel vyf klippies op en stap na die reus.

Goliat lag toe hy vir Dawid sien. "Jy dink ek is 'n hond wat jy met 'n stok kan wegjaag. Vandag maak ek jou dood."

Dawid sê: "Jy het 'n spies en 'n swaard, maar God sal my help." Hy sit 'n klip in die slingervel en swaai dit 'n paar keer in die rondte. Die klip trek deur die lug en tref Goliat tussen die oë. En daar slaan die reus mordsdood neer. Toe die Filistyne dit sien, hardloop hulle weg. Die Israeliete is baie bly. Dawid het geglo God sal hom help, en Hy het ook.

Verhaal geneem uit Ons eie Kleuterbybel, bl.64-65, Juliana Nothnagel en Johann Strauss

4. DAWID EN JONATAN

Aktiwiteit: Wat is 'n vriend?: Gebruik die uitdeeltuk met eienskappe wat jy in 'n vriend sal wil hê. Plaas dit in die middel van julle en lees dit saam. Vra elkeen om twee eienskappe van dit wat gelees is te noem, wat vir hulle belangrik in 'n vriend is.

Verhaal:

Koning Saul se seun, Jonatan, het staan en kyk hoedat Dawid vir Goliat verslaan. Niemand anders kon dit regkry nie, en Dawid was nie eers 'n soldaat in Saul se leer nie.

Toe Dawid na Saul toe gebring word, het Jonatan gedink hy is baie dapper. Die twee het groot vriende geword en was baie lief vir mekaar. Jonatan het belowe dat hy altyd vir Dawid soos 'n broer sou wees. Om te wys dat hy dit regtig bedoel, het hy vir Dawid sy mantel, sy swaard, sy boog en sy gordel gegee.

Koning Saul het toe vir Dawid in sy paleis laat bly en hom oor sy soldate aangestel. Die soldate was baie tevrede om Dawid as leier te hê.

Op die dag wat Dawid vir Goliath doodgemaak het, het daar ook iets anders gebeur. Baie vrouens het na Dawid toe gekom en om hom gesing en gedans. Hulle het gesing: "Saul het duisende verslaan, maar Dawid tienduise!" Hieroor was Saul baie jaloers, en hy het begin om Dawid fyn dop te hou.

Verhaal geneem uit Gunsteling Bybelverhale vir kinders, bl.110-111, V.Gilbert Beers en Ronald A. Beers

5. SAUL PROBEER DAWID VERMOOR

Aktiwiteit: Beroemde mense: Skryf 'Popster' op een blaai en 'Sportster' op 'n ander blaai en plak dit teen die muur vas. Vra almal om eers bekende popsterre se name te noem en skryf dit op die blaai. Dink dan saam aan bekende sportsterre. Vra daarna hoekom die mense bekend is?

Verhaal:

Saul was jaloers op Dawid toe die vrouens sing dat hy duisende verslaan het, maar Dawid tienduise. Hy het begin wonder of die volk liever vir Dawid as koning wou hê. Die volgende dag was Saul baie omgekrap, en Dawid het weer soos altyd vir hom op die lier gespeel sodat hy kon beter voel. Toe gooi Saul skielik sy spies na Dawid om hom te probeer doodmaak, maar Dawid het weggekoes. Saul het weer probeer, maar weer was dit mis. Hierna het die mense nog meer van Dawid gehou, want hy was verstandig in alles wat hy gedoen het. Dit het Saul nog net meer jaloers gemaak.

Saul het vir Dawid belowe dat hy met sy oudste dogter, Merab, mag trou, maar hy laat haar toe trou met 'n ander man. Toe een van Saul se ander dogters, Mikal, vir Dawid liefkry, het Saul gesê Dawid mag met haar trou, maar hy moes eers 'n honderd Filistyne doodmaak. Dawid en sy soldate het toe 200 Filistyne doodgemaak en daarna is hy en Mikal getroud.

Die mense het nou meer as ooit van Dawid gehou, daarom het Saul gevra Jonatan en nog 'n paar mans moet vir Dawid doodmaak, maar hulle wou nie.

"Dawid het probeer om Pa te help," het Jonatan vir Saul gesê. "Waarom wil Pa hom nou doodmaak?" Toe het Saul 'n ruk lank die plan gelos, maar eendag terwyl Dawid weer vir hom op die lier speel, het hy weer sy spies na Dawid gegooi en hom amper doodgemaak. Toe sê Saul vir sy mense om Dawid die volgende oggend dood te maak. Maar Mikal het van dié plan gehoor en vir Dawid gehelp om in die nag weg te kom.

Verhaal geneem uit Gunsteling Bybelverhale vir kinders, bl.112-113, V. Gilbert Beers en Ronald A. Beers

Dawid het toe maar so rondgetrek en weggekrui vir Saul. Ek dink dit moes vreeslik vir Dawid gewees het om so te leef. Weet julle dat daar selfs twee kere was wat Dawid vir Saul kon doodmaak? Maar elke keer het Dawid besluit om dit nie te doen nie.

6. SAUL STERF

Verhaal:

Die Israeliete was besig om teen die Filistyne te veg op Gilboaberg en baie Israeliete is daar dood. Die ander het gevlug. Koning Saul en sy seuns het ook probeer om weg te hardloop, maar die Filistyne het hulle gevang en Saul se drie seuns, Jonatan, Abinadab en Malkisua doodgemaak.

Die Filistynse soldate het ook vir koning Saul agtervolg en hom swaar gewond. Toe sê Saul vir sy wapendraer: “Maak my dood sodat die Filistyne my nie in die hande kan kry nie.” Die man was bang om sy eie koning dood te maak, toe val Saul op sy eie swaard. Die wapendraer het toe ook op sy swaard geval en gesterf.

Na Saul se dood het Dawid vir die Here gevra of hy na Juda toe moet teruggaan. Toe die Here ja sê, het Dawid vir Hom gevra waarheen hy moes gaan.

“Gaan Hebron toe,” het die Here geantwoord.

Die leiers van Juda het toe na Hebron toe gekom en Dawid hulle koning gemaak.


Verhaal geneem uit Gunsteling Bybelverhale vir kinders, bl120-123 V. Gilbert Beers en Ronald A. Beers

Aktiwiteit: Laat almal in 'n ry staan, van die persoon met die grootste skoene grootte tot die een met die kleinste skoene grootte. Kom ons kyk wie dra die grootste skoene. Wie dra die kleinste?

Toe God 'n koning gekies het, het Hy nie gekyk na die wie die grootste, sterkste of langste persoon was nie. Waarna het God gekyk? Hy het gekyk na die hart. God gee om wat in ons harte aangaan en nie of ons lank of kort, sterk of nie so sterk is nie.

7. OPSOMMING: Video clip: <https://youtu.be/OnNXbj6udy4>

Julle het nou 'n goeie prentjie van die eerste deel van Dawid se lewe gekry. Indien jy toegang tot die internet het, speel die video clip wat al die hoofpunte mooi saamvat vir in geval julle iets êrens gemis het.



Wat is 'n vriend?

Gewild

Baie slim

Vriendelik

Trek die regte klere aan

Ryk

Eerlik

Hou jou geheime

Kan lekker grappe vertel

Baie goed in sport

Luister baie goed

Baie mooi

Liefdevol

Kind van God

Bly jou vriend maak nie saak wat nie